

Mahathir - Pemimpin

PERALIHAN KEPIMPINAN MUSTI BERLAKU DALAM KEADAAN TENANG, KATA PM

SIBANG, 22 April (Bernama) -- Perdana Menteri Datuk Seri Dr Mahathir Mohamad hari ini berkata, peralihan kepimpinan dalam UMNO haruslah berlaku dalam keadaan yang tenang.

Dr Mahathir, yang juga Presiden UMNO, berkata keadaan sedemikian akan menjamin kestabilan serta kekuatan parti itu.

Ketika melancarkan "Gerak Kerja Perdana" Pergerakan Pemuda UMNO di sini, Dr Mahathir berkata, jika seseorang calon itu dipilih ke jawatan tertentu, maka penyokong calon lawannya haruslah memberi kerjasama dan sokongan kepada calon yang menang itu.

"Kita haruslah rapat semula dan menyokong pemimpin baru itu," kata beliau.

Beliau berkata, anggota Pemuda UMNO yang beraspirasi untuk menggantikan para pemimpin yang sedia ada haruslah mengetahui matlamat parti agar mereka dapat mengekalkan kesinambungan dalam parti itu. -- Lagi.

▼22/04/16-13MST

R PR 22-04 00094 BA045

aah

Mahathir - Pemimpin 2 Subang

"Janganlah terlalu gopoh (untuk menjadi pemimpin)...terlalu awal," kata beliau.

Beliau berkata, mereka seharusnya mengenal pasti segala aspek mengenai prinsip dan perjuangan UMNO agar dapat bergerak secara berkesan.

"Kalau mereka mengambilalih tanpa persiapan yang kukuh, maka matlamat (parti) tidak akan tercapai," kata beliau.

Katanya, program seperti Gerak Kerja Perdana itu dapat melatih generasi pemimpin pelapis untuk mengambilalih kepimpinan UMNO.

Dr Mahathir berkata, mereka juga mestilah sanggup mendukung serta meneruskan segala dasar yang telah dirangka oleh parti. -- Lagi.

▼22/04/16-14MST

R PR 22-04 00124 BA048

aah

Mahathir - Pemimpin 3 Subang

Dr Mahathir berkata, anggota Pemuda UMNO haruslah berwaspada terhadap pihak tertentu yang ingin memecahbelahkan parti itu dengan menyebarkan "berita angin" kononnya "pemimpin itu dengan pemimpin ini sudah tak secocok...yang ini nak menjatuhkan yang itu," dan sebaliknya.

Katanya, berita angin itu kini berleluasa sehingga akhbar-akhbar luar negara juga "telah menghidu bau berita itu" kononnya "sudah ada perbalahan di kalangan pemimpin-pemimpin UMNO".

"Ini semua niat buruk...mereka tidak senang hati dengan perpaduan dan keteguhan UMNO.

"Justeru itu, pengajaran pertama bagi anggota Pemuda (UMNO) ialah mengelak daripada sebarang perpecahan," kata beliau.

Beliau berkata, anggota Pemuda juga tidak harus membenarkan emosi menguasai pemikiran mereka ketika menjalankan sebarang aktiviti pergerakan. -- Lagi

▼22/04/16-49MST

aah

Maharnir - Pemimpin 4 (akhir) Subang

Ketua Pergerakan Pemuda UMNO Tan Sri Abdul Rahim Tamby Chik, dalam ucapannya berkata, pergerakan itu telah merancang pelbagai program sepanjang tahun ini.

Antaranya ialah latihan khas perkaderan meliputi sehingga 100,000 pemimpin pergerakan itu dari peringkat pusat hingga cawangan.

Pergerakan itu juga akan melancarkan satu projek anti kemiskinan bagi memperhebatkan lagi usaha membasmi kemiskinan di seluruh negara, kata Rahim yang juga Ketua Menteri Melaka.

Antara yang hadir pada majlis itu ialah beberapa menteri dan timbalan menteri daripada UMNO. -- Bernama

KS NMO